

## ԱՎԱԶԱԿՆԵՐԻ ՀԵՏԱՊՆԴՄԱՆ ՄԱՍԻՆ ՂԱԶԱՆԻ ԳԱՎԱՌՈՒՄ

### («Նովոյե օբոզրենիայի» թղթակցությունը)

Հաջիքենդի մոտ ուղևորներին կողոպտելուց հետո, Ղազախի փախստականները<sup>1</sup> որոնց, ինչպես պիտի ենթադրել, Ելիզավետպոլի գավառի փախստականներն էին հրավիրել, օգոստոսի 12-ին ուղևորվեցին Ելիզավետպոլի գավառ՝ ճանապարհին մի շարք կողոպուտներ անելով, որոնց մասին արդեն մի շարք հաղորդումներ են տպագրվել «Նովոյե օբոզրենիայում»: Ղազախի գավառի սահմանագծում ավազակները բաժանվեցին երկու խմբի, որոնցից մեկը՝ թվով 5 մարդ, Ղազախի մոտից գնաց դեպի ոստիկանական 2-րդ տեղամաս, իսկ մյուս երեքը գնացին դեպի Կոզոշկերտ գյուղ, որտեղ տեղավորվեցին փախստականներից մեկի՝ Մաշադի Ալիարի այգում: Գավառապետ Ի. Խ. Կանչալին, որը հետապնդում էր փախստականների 5 հոգուց բաղկացած խմբին, տազիխյան երկաթուղային կայարանի պետից հեռագիր ստացավ այն մասին, որ չարագործները տեղավորվել են հիշյալ Մաշադի Ալիարի այգում: Գավառապետն այդ հեռագիրը հանձնեց իր աստիճանավորներից մեկին՝ Կենբալանին, որը, ձիավորներ առած, գնաց փախստականներին բռնելու, բայց հիշյալ այգին հասնելով, այնտեղ այլևս ոչ ոքի չգտավ: Կավլարսարլուում և Ելիզավետպոլի ու Ղազախի գավառների սահմանագլխում հայտնաբերվել է կողոպտված իրերի մի մասը՝ կտորեղեն ապրանքներ, ինչպես նաև մի թամբած ձի: Գավառապետը շարունակել է հետապնդել փախստականներին: Նրանց հետքերը կորել են, սակայն օգոստոսի 18-ի լույս 19-ի գիշերը գավառապետն իր գործակալների միջոցով տեղեկություն է ստացել, որ փախստականները օգոստոսի 18-ին եկել են հայկական Ակսիբարա գյուղ՝ Եվինով Խեչոյի տուն և այնտեղ թաքնվել: Գավառապետը, որ այդ ժամանակ գտնվել է Ակսիբարայից 30 վերստ հեռու, Ղամարլու գյուղում, իր գորախմբով, որը կազմված էր տեղամասի պահակախմբից, ուղեբաժնի պարեկներից և կազակների ջոկատից՝ գրենադերյան գնդի պարուչիկ Կաչևսկու հրամանատարությամբ, ուղևորվել է

<sup>1</sup> Այստեղ այդպես են կոչվում բոլոր դատից ու քննություններից խույս տվողներն ու տաժանավայրերից փախած հանցագործները:

Ակսիբարա, ուր և հասել է առավոտյան ժամը 5-ին: Հետապնդողները, 4 խմբի բաժանվելով, բոլոր կողմերից շրջապատել են Խեչո Եվինովի տունը: Դա տեսնելով, ավազակ Խեչոյի մայրը ընդառաջ է ելել և խնդրել մի քանի բռնակալներին չմտնել, որպեսզի տան կանայք հնարավորություն ունենան հագնվելու: Միաժամանակ նա քնած փախստականներին տեղեկացրել է սպառնացող վտանգի մասին: Փախստականները հագնվելով ու զինվելով, մի քանի անգամ տանից կրակել են ու դուրս վազել, որ թաքնվեն մոտիկ անտառում: Հետապնդողների և փախստականների միջև սկսվել է համառ փոխհրաձգություն, որի ավարտից հետո պարզվել է, որ սպանվել են 2 փախստական՝ Խեչո Եվինովը և նրա ընկեր Նաբին, իսկ կազակ Բաբիչն ու Եվինովի մայրը վիրավորվել են: Սպանված փախստականների ընկերները՝ Դադաշ Նաջաֆ-օղլին (Նաբիի եղբայրը), Կուրումսուլու գյուղի բնակիչ, փախստական զինվոր Եգոր Պապինը, իրականում Ղամբար Մամեդ-օղլին, որը կոչվել է Իսմայիլ Լիլիա-օղլի, Խեչոյի տանը չեն հայտնաբերվել: Նրանց գտնելու համար ձեռք են առնվել եռանդուն միջոցներ: Սպանված Եվինովի տունը խուզարկելիս գտել են մի քանի ժամացույց, ատրճանակներ, սպիտակեղեն, Գևորգյան խաչ, որը պատկանել է կամ ուղեմասի պետ Գեղևանովին, կամ ոստիկանական պրիստավի օգնական Մելիք-Օսիպովին, և Հաջիբենդի մոտ կողոպտված մարդկանց այլ իրեր:

Մեջ եմ բերում այդ ավազակների մասին հուսալի աղբյուրներից քաղված որոշ հավաստի տեղեկություններ.

Սպանված Խեչո Եվինովը փախստական է դարձել անցյալ տարվա սեպտեմբերին, ոստիկանական պրիստավ Տատարինովի անհաջողությունից հետո, որը Ելիզավետպոլի գավառապետի հանձնարարությամբ ցանկացել է Խեչոյին ձերբակալել: Նրա ընկերը՝ Նաջաֆ-օղլին, նա ինքը՝ Նաբի Դադաշը, փախստական է դարձել իր մի համագյուղացուն ու նրա որդուն սպանելուց հետո: Նա մեղադրվում է բազմաթիվ կողոպուտների և սպանությունների մեջ, այդ թվում Բորչալվի և Ղազախի գավառների սահմանագծում շրջող մի հայ պարեկի: Փախստական զինվոր Եգոր Պապինը գնդից փախչելուց հետո գավառի ոստիկանության կողմից ձերբակալվել և հանձնվել է

Ղազախի առաքման հավաքակայանին՝ կրկին իր գունդն ուղարկվելու համար: Բայց հավաքակայանից փախել ու Հաջիքենդի կողոպուտի նախօրյակին միացել է Խեչոյին: Ինչ վերաբերում է Խեչոյի 5-րդ ընկերոջը՝ Իսմայիլ-օղլի Ղամբարին, ապա նա ավելի քան 10 տարի առաջ, Բորչալվի գավառում մարդ է սպանել ու դատապարտվել տաժանակրության: